

# Mud Volapüka

Nüm 80

27 tobul 2017

---

## Bukemaboed

Fövot lekoned-mära yutopik  
„Ventürs hiel ‚Nenolikan‘ e flenas omik“  
fa hiel „N. N. Nosov“

Finot kapita teldegzülid. Pö baol.

Tobö kor edenexänon de skaf, Lüran elüvom musigalefi okik, edoniokömom ve stafäd se tead löpik, exänom sui skaf ed ävokädöm:

„Isiö, o kompenans! Isiö!“

Nolikan, Spidülan, sanan: Pilulülan< e kompenans retik Nolikana exänoms sui skaf.

„Prüdö!“ - Lüran ävokädöm. - „Nu kor hicililas di Florazif obitidon.“

Eprimom ad bepläyön fluti okik e hicilils valik kobädiko äkanitoms kaniti dö caradül, keli poedan: Florülan< ilautom:

„Ästadon pö yeb caradül,

Go äsva kügöl

Ut äbinon grüniku,

Ut äbinon grüniku.

Äfidon te yebüli,

No äludämon igo näsäki smalikün

Ed äflenon kol musaks,

Ed äflenon kol musaks.

Ab süpo frog ekömon

Labü bälid zibi-desirik,



Ed efifidon caradi,  
Ed efifidon caradi.  
Carad no äbüocedon, no äniludon,  
Leno äspeton  
Päridikami somik,  
Päridikami somik!“

E kanit at äbinon so lügiku, das pö fin ona igo its kanitans no etaetons drenis ed ädrenons liedo. Valikans äpidons caradüli neläbik, keli frog zibidesirik efifidon. Drens mödik äflumons se logs utanas.

„Caradül gudik kion äbinon!“ - Perönülan äslokom.

„Ämiträiton go nosi ed äflenon kol musaks.“ - Spidülan esagom.

„E frog efifidon oni demü atos!“ - Skrubülan eläükom.

Te Nenolikan no ädrenom ed ätrodom kompenanis okik:

„No drenolsös, o kompenans! Frog no äfidon caradüli. Atos neveraton.


Ut efifidon musaki.“

„Lindifos...“ - Skrubülan äslokom. - „Pidob musaki koo.“

„Ab kikodo nedos ad pidön musakis? Uts te böladons valikanis ä spearükons malädilis. Leno nedos ad drenön demü musaks.“

„Leno drenob demü musak.“ - Murülan esagom. - „Te ememikob vio äkanitobs kaniti at kü ästadobs lomo.“

Attimo Nenolikan eprimom ad rorön so laodiko, das valikans efinikons ad drenön demü stun ed



ätrodons omi. Valikans äsäkons omi: kikodo adrenom so laodiko<, ab Nenolikan äslokom ed ägesagom nosi. Fino esagom älai-slokölo:

„Leglifob de... demü Fla... demü Flabülan [bi Flabülan nekomom is]!“

„Kikodo üfo?“ - valikans estunikons. - „No äleglifol büo, ab süpo eglifikol!“

„Si!“ - Nenolikan egesagom vimädo. - „Stadob is, ab Flabülan blibom lomo!“

„Ga Flabülan olik no uvesetikom nen ol.“ - Spidülan esagom.

„Nö, uvesetikom! Sevob, das koo leglifom demü ob. Flabülan binon flenü lesevadikün obik, ab igo no ileditikob de om kü ädeflitobs pö bälun.“

„Kikodo no ileditikol üfo?“

„Izanikob kol ol e no ävilob leditön. Kü ädeflitobs, nenropo älülogedom lü ob ed ävinegom obi lefänölo me brad okik, ab igo desino edeflekob obi de om ed no ävilom lülogedön lü om. Ettimo äpleidob demü utos, das flitob pö bälun, ab nu obi tomon... lio ut panemon?..“

„Konsien-li?“ - sanan: Pilulülan< ebüa-sagom.

„Si, si, o kompenans, konsien! If ileditikoböv, tän senoböv oki gudikumo. Lomiovegobsös, o kompenans, urekosilob kobü Flabülan odi ed uleditikob de om.“

„Üf ufi-lomiovegobs, tän onedos ad glidön plas leditön.“ - Nolikan esagom.

„Ga büiküno uleditikob e pas täno uglidob omi, e valikos uleodikon.“

„Fädos, o flens, das mutobs ge-tevön.“ - Lüran esagom. - „Nenolikan vilom lomio.“

„Si, o kompenans, koo mutob lomiovegön.“ - Pilulülan esagom. - „Ga ek kanon malädikön tö Florazif nen ob, ab nek okanon lekälön utani.“

„Soö! Saidos ad muadön obis.“ - Nolikan egesagom. - „Ga fino seimüpo onedos ad lomiovegön. Omotävobs odelo.“

Baol efinikon. Blövalogikan elügolof lü Nenolikan.

„Ekö! leditogs de od.“ - esagof lügiko.

„Si...“ - Nenolikan egesagom nelaodiko. - „Tim ad lomiovegön kol obs ekömon.“

„Älotors go brefüpo pö obs.“

„Vemo vilob lai=lotön nog boso, ab i vilob lomiovegön.“ - Nenolikan esagom, edonikölo kapi okik.

Blövalogikan äletikof dö bos, poso esagof:

„Lesi, ya nedor getevön lomio. Flens orik blibons lomo, kels dredälons-la dö or. Bitor gudiko, no glömölo flenis orik.“

Atans bofik ästanons stiliko ünü tim anik. Nenolikan ävilom sagön bosi, ab dub kod seimik äbinos nabiko pö gug omik e vöds no äkanons sedranön dese on. Älülögom donio, änü=pedom gluni me hil e no äkünom ad lülogedön lü Blövalogikan. Ädredom, das uküpof drenis pö log omik. Fino atans elöpiotovons kapis okik. Logs utanas älülogedons lü od.

„Vilor=li, das ube=skrädob sakädi pro ol ad täv?“ - esäkof.

„Vilob.“

Tü del fovik Nolikan kobü kompenans okik ede=tevom. Utans esludom ad tävön futo. Bälun ispranon, ed äbinos fikuliku ad nätükön oni, zu vien äl lüod zesüdik änekomon. Nolikan kipölo kompadi pö nams äbugolom [ägolom bu valikans], po utan sanan: Pilulülan< ägolom, po sanan Skrubülan e Lebuonülan äsökoms, e pas etans hicilils retik ägoloms. Nenolikan ägolom pödü valikans.

Alikan älabom sakädi po bäk okik. Jicilils ibeskrädofs sakädis at pro hi=etans. Keks pro täv ä sids flukas, härbatas e floras valasotik nekomöls pö Florazif äkomons pö sakäds. Sirupülan äkepolom vatameluna=pütis a bal pö pok alik okik. Jicilils valik esegolofs [pö süts] ad leditön de hicilils. Ji= mödikans bevü ji=atans ädrenofs.

„No drenorsös.“ - Nolikan äsagom ji=etanes. - „Seimüpo dönu ujafädobs bäluni ed ulüflitobs lü ors.“

„Ulüflitorsös ün florüp kü podabims oflorons!“ - jicilils ävokädofs. - „Ün florüp binos vemo jöniku pö obs [pö zif obsik].“

Jicilils estopikofs pö siem zifa, ab hicilils älai-tevoms ve veg bei natädöp binü yeb e felaflores.

„Adyö! Adyö!“ - jicilils ävokädofs ed älefänofs bradis.

„Adyö!“ - hicilils ägesagoms ji-etanes.

Blövalogikan älefänof bradi stiliko.

Pos brefüp hicilils ästadoms ya fagiko [de ofs] e tio no älliloms vögis jicililas.

„O Nenolikan! O Nenolikan!“ - Blövalogikan ävokädof süpiko.

Nenolikan eflekom oki.

„Pened, o Nenolikan! Pened!“

Nenolikan töbidiküno änutom ed älefänom häti.

„Elelilom!“ - Blövalogikan efredikof.

Pos brefüp tävans eecenoms ad püns töbido pa-küpöls, ab poso lölöfiko enepuboms dub vega-flek. Jicilils pianiko edegolofs lü doms. Ji-valikans äleglifofs.

*Reidolsös fövoti konota pö nüm fovik.*